

Year of
Consecrated Life



PATNUBAY SA MISA



12 Hulyo 2015

Ika-15 Linggo sa Karaniwang Panahon


Taong B

MAY MISYON SA MUNDO AT SA DIYOS LAMANG NANANALIG

*S*pinaaalaala sa atin ngayong ang Simbahan ay likas na may katangiang misyonero. Sa mula't mula, sinugo ng Panginoon ang kanyang mga alagad para mangaral ng Ebanghelyo, magpaalis ng masasamang espiritu, at kumalinga sa mga mahihina at maysakit.

Napakalaki nitong tungkuling malamang na tanggihan at tutulan. Ngunit di ito dapat maging dahilan para manghina ang ating kalooban, kundi dapat pa ngang magpasigla para tayo magsikap, habang nananalig lamang sa kapangyarihan ng biyaya ng Diyos at ng Kanyang Salita. Ang kahinaan ng Krus ay higit na makapangyarihan sa lahat mang kayamanan sa daigdig.

Tandaan natin ito ngayong nagsisimula tayo sa pagdiriwang ng Eukaristiya, at ialay natin ito lalung-lalo na para sa nasa apostoladong paglilingkod.



PASIMULA



Pambungad

(Ipahahayag lamang kung walang awiting nakahanda.)

Akong iyong pinatawad sa iyo'y makahaharap nang mukha mo ay mamalas. Sa piling mo'y magagalak pag liwanag mo'y sumikat.

Pagbati

P –Pagpalain si Hesus na nagsugo sa atin sa isang misyon sa mundo. Ang kanyang biyaya at kapayapaan ay sumainyong lahat!
B –**At sumaiyo rin!**

Pagsisisi

P –Sa paghahanda natin para sa pagdiriwang ng mga banal na misteryo, alalahanin natin ang ating mga kasalanan at hilingin sa Panginoon ang kapatawaran at lakas. *(Manahimik saglit.)*

P –Panginoong Hesus, ikaw ang propetang sinugo ng Ama para mapagbalik-loob ang mga tao. Panginoon, kaawaan mo kami!

B –**Panginoon, kaawaan mo kami!**

P –Panginoong Hesus, sinugo mo ang iyong mga alagad para mangaral ng Mabuting Balita sa lahat ng bansa. Kristo, kaawaan mo kami!

B –**Kristo, kaawaan mo kami!**

P –Panginoong Hesus, nais mong manalig ang iyong mga disipulo at mga alagad sa kapangyarihan lamang ng iyong salita at biyaya. Panginoon, kaawaan mo kami!

B –**Panginoon, kaawaan mo kami!**

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –**Amen!**

Papuri

B –Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong

Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, nililiwanagan ng iyong maaasahang ilaw ang mga naliligaw na iyong pinabalik sa daan para ikaw ay matagpuan. Ang mga kabilang sa nananalig sa iyong Anak ay pagkalooban mong makapagwaksi sa tanang salungat sa ngalang Kristiyanong sa iyo'y tinanggap upang ito ay talagang mapangatawanang ganap sa pama-

magitan ni Hesukristo kasama ng Espiritu Santo magpasawalang hanggan.

B – Amen!

PAGPAPAHAYAG NG SALITA NG DIYOS



Unang Pagbasa Amos 7:12-15

Si Amos, na isang dating pastol na taga-Tekoa sa Juda, ay naharap sa gulo sa Hilagang Kahariang pinagpadalhan sa kanya ng Panginoon. Dahil sa kanyang katapatan sa ibinigay sa kanyang misyon, siya'y ipinagtabayon gaya ng isinasaad sa pagbasa ngayon.

L– Pagpapahayag mula sa Aklat ni Propeta Amos

Noong mga araw na iyon, hinarap ni Amasias, ang saserdote sa Betel, si Amos, “Bulaan kang propeta! Magbalik ka na sa Juda; doon ka maghanapbuhay sa pamamagitan ng iyong panghuhula. Huwag ka nang manghuhula rito sa Betel. Narito ang pambansang templo at dito sumasamba ang hari.”

Sumagot si Amos, “Hindi ako propeta – hindi ko ito hanapbuhay. Ako’y pastol at nag-aalaga rin ng mga punong-igos. Ngunit inalis ako ng Panginoon sa gawaing iyon at inutusang magsalita para sa kanya, sa mga taga-Israel.”

Ang Salita ng Diyos!

B – Salamat sa Diyos!

Salmong Tugunan Awit 84

B – Pag-ibig mo’y ipakita, iligtas kami sa dusa!

R. M. Velez



Pag-i-big mo'y i- pa- ki- ta,



i-lig--tas ka- mi sa du--sa!

* Aking naririnig magmula sa Poon ang sinasalita; sinasabi niyang ang mga lingkod n’ya’y magiging payapa, kung mangagsisisi at di na babalik sa gawang masama. Ang nagpaparangal sa pangalan niya’y kanyang ililigtas, sa ating lupain ay mananatili ang kanyang paglingap. **B.**

* Ang pagtatapatan at pag-iibiga’y magdadaup-palad, ang kapayapaan

at ang katwira’y magsasamang ganap. Sa balat ng lupa’y pawang maghahari yaong pagtatapat, at ang katarungan nama’y maghahari mula sa itaas. **B.**

* Gagawing maunlad ng Panginoong Diyos itong ating buhay, ang mga halaman sa ating lupa’y bubungang mainam; sa harapan niya yaong maghahari’y pawang katarungan, magiging payapa’t sunod ang madla sa kanyang daan. **B.**

Ikalawang Pagbasa Ef 1:3-14

Sa anyo ng isang maikling panalangin, ipinahahayag ni San Pablong lahat ng pagpapala ay nagmumula sa Diyos Ama, nakasentro kay Hesukristo, at natutupad sa Espiritu Santo.

L– Pagpapahayag mula sa Sulat ni Apostol San Pablo sa mga taga-Efeso

Magpasalamat tayo sa Diyos at Ama ng ating Panginoong Hesukristo! Pinagkalooban niya tayo ng lahat ng pagpapalang espirituwal dahil sa ating pakikipag-isa kay Kristo.

At sa atin ngang pakikipag-isang ito, hinirang na niya tayo bago pa nilikha ang sanlibutan upang maging banal at walang kapintasan sa harapan niya. Dahil sa pag-ibig ng Diyos, tayo’y kanyang itinalaga upang maging mga anak niya sa pamamagitan ni Hesukristo. Iyan ang kanyang layunin at kalooban. Purihin natin siya dahil sa kanyang kahanga-hangang pagkalinga sa atin sa pamamagitan ng kanyang minamahal na Anak!

Tinubos tayo ni Kristo sa pamamagitan ng kanyang kamatayan at sa gayo’y pinatawad na ang ating mga kasalanan. Gayon kadakila ang pag-ibig na ipinadama niya sa atin! Binigyan niya tayo ng karunungan at kabatiran upang lubos nating maunawaan ang kanyang lihim na panukala na isasakatuparan sa pamamagitan ni Kristo pagdating ng takdang panahon. Ang panukalang ito ay pag-isahin kay Kristo ang lahat ng nasa langit at nasa lupa. At dahil kay Kristo, kami’y naging bayan ng Diyos na nagsagawa ng lahat ng bagay ayon sa kanyang panukala at kalooban. Nangyari ito nang kami’y hirangin niya noon pang una – kaming mga unang umasa kay Kristo – sa lalong ikadadakila niya.

Kayo ma’y naging bayan ng Diyos nang kayo’y manalig sa kanya

matapos ninyong marinig ang salita ng katotohanan – ang Mabuting Balita na nagdudulot ng kaligtasan. Kaya’t ipinagkaloob sa inyo ang Espiritu Santong ipinangako ng Diyos bilang tatak ng pagkahirang sa inyo. Ang Espiritu ang katibayan ng mga pangako ng Diyos sa ating mga hinirang hanggang kamtan natin ang lubos na kaligtasan. Purihin natin ang kanyang kadakilaan!

Ang Salita ng Diyos!

B – Salamat sa Diyos!

Aleluya

Ef 1:17-18

B – Aleluya! Aleluya!

D’yos Ama ni Hesukristo, kami ay liwanagan mo at tutugon kami sa ‘yo. Aleluya! Aleluya!

Mabuting Balita Mc 6:7-13

Ang mga alagad ay dapat mamuhay nang malayo sa mga materyal na ari-arian at may kahandaang dumanas ng pagtatakwil gaya ng kanilang Panginoon.

P – Ang Mabuting Balita ng Panginoon ayon kay San Marcos
B – Papuri sa iyo, Panginoon!

Noong panahong iyon, tinawag ni Hesus ang Labindalawa, at sinu-gong dala-dalawa. Binigyan niya sila ng kapangyarihang magpalayas ng masasamang espiritu at pinagbilinan: “Sa inyong paglalakbay, huwag kayong magdala ng anuman, maliban sa tungkod. Ni pagkain, balutan, salapi sa inyong lukbutan o bihisan, ay huwag kayong magdala. Ngunit magsuot kayo ng panyapak.” Sinabi rin niya sa kanila, “At sa alinmang tahanang inyong tuluyan – manatili kayo roon hanggang sa pag-alis ninyo sa bayang iyon. Kung ayaw kayong tanggapin o pakinggan sa isang dako, umalis kayo roon at ipagpag ninyo ang alikabok ng inyong mga paa, bilang babala sa mga tagaroon.”

Kaya’t humayo ang Labindalawa at nangaral sa mga tao na pagsisihan nila at talikdan ang kanilang mga kasalanan. Pinalayas nila ang maraming demonyo sa mga inaalihan nito; pinahiran nila ng langis at pinagaling ang maraming maysakit.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inililing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Bilang tanda ng kanyang pagmamahal at malasakit sa sangkatauhan, patuloy si Hesus sa pananawagan sa gawaing apostolado sa maraming iba't ibang tao. Ipanalangin natin sila at ang mga tagapakinabang sa kanilang apostoladong pagsisikap. Manalangin tayo:

B—Hari ng mga apostol, dinggin mo kami!

* Para sa buong pamayanang Kristiyanong: Nawa manatili itong tapat sa misyon nitong mangaral ng pagsisisi at labanan ang lahat ng sama. Manalangin tayo! **B**.

* Para sa mga tagatanggap ng mensahe ng kaligtasan: Nawa buksan nila ang kanilang mga kalooban sa Panginoon at tumulad sa kanyang halimbawa. Manalangin tayo! **B**.

* Para sa mga natutuksong umaasa sa mga yamang materyal, karangalan o kapangyarihang pulitikal sa halip ng sa mga pagpapahalagang moral: Nawa lagi nilang alalahaning iniligtas ni Hesus ang sanlibutan sa pamamagitan ng kahihiyang ng krus. Manalangin tayo! **B**.

* Para sa mga naatasang maglingkod sa misyon sa ibang bansa: Nawa agad silang makatugon nang buong puso. Manalangin tayo! **B**.

* Para sa lahat ng misyonerong tinatanggihan: Nawa huwag silang panghinaan ng loob, kundi magalak silang matulad kay Hesus na di tinanggap at sa halip ay pinahirapan. Manalangin tayo! **B**.

* Tahimik nating ipanalangin ang ating mga pansariling kahilingan. (*Tumigil saglit.*)
Manalangin tayo! **B**.

P—Panginoong Hesukristo, Alagad ng Ama, gawin mo kaming matapang at banal upang maipalaganap namin ang iyong Kaharian sa aming lipunan. Ikaw na nabubuhay at naghahari nang walang hanggan.

B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, tung-hayan mo ang mga alay ng iyong sumasamong Sambayanan at tanggapin mo ang mga ito para madagdagan ang iyong kabanaan sa mga nananalig na tunay sa pamamagitan ni Hesukristo kasama ng Espiritu Santo magpasawalang hanggan.

B—Amen!

Prepasyo I

P—Ama naming makapangyarihan, tunay ngang marapat na ikaw ay aming pasalamat na pamamagitan ni Hesukristo na aming Panginoon.

Sa dakilang pagtubos niya sa amin ang kasalana't kamatayang aming pasanin ay binalikat niya upang kami'y palayain at maitampok sa iyong luningning. Siya ang nagtanghal sa amin bilang liping hinirang, pari at haring lingkod sa iyong kamahalan. Mula sa kadiliman, kami'y iyong tinawag upang makasapit sa iyong

liwanag bilang iyong angkang may tungkuling maglahad ng iyong dakilang pag-ibig sa lahat.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo, Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B—Ama naming . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikininabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.
B—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikininabang

(*pahahayag lamang kung walang awiting nakahanda.*)

Mga mayang nagpupugad sa templo mo'y nagalak. Panginoon, silang lahat sa piling mo bawat oras ay talagang mapapalad.

Panalangin Pagkapakinabang

P—Ama naming mapagmahal, kaming mga pinapagsalo mo sa

piging na banal ay makatatanggap nawa ng bungang karagdagan ng iyong pagliligtas na aming ipinagdiriwang sa pamamagitan ni Hesukristo kasama ng Espiritu Santo magpasawalang hanggan.
B – Amen!

P – Gabayan Niya nawa kayo tungo sa Kanya at turuan kayong manunton sa kawanggawa at kapayapaan.

B – Amen!

P – Pagpalain kayo ng makapangyarihang Diyos: Ama, Anak,

at Espiritu Santo.

B – Amen!

P – Humayo kayo sa kapayapaan upang mahalina at paglingkuran ang Panginoon.

B – Salamat sa Diyos!

PAGWAWAKAS



P – Sumainyo ang Panginoon.

B – At sumaiyo rin!

P – Magsiyuko kayo at ipanalangin ang pagpapala ng Diyos. (*Manahimik saglit.*)

Iadya nawa kayo ng makapangyarihang Diyos sa lahat ng masama at ipaunawa sa inyong lagi ang Kanyang mapagligtas na karunungan.

B – Amen!

P – Tibayan Niya nawa ang inyong pananalig sa mga patunay ng Kanyang pagmamahal, upang magsikap kayo sa inyong mabubuting gawa.

B – Amen!

Ang simple at pinaikling talambuhay ng santong tunay na nagmahal sa mga kabataan . . . at paborito ng mga kabataan . . .

SA AKING MGA KABATAANG PILIPINO



Espesyal na nilimbag para sa ika-200 Pag-aalaala sa Kaarawan ni San Juan Bosco.

Umorder na sa

Word & Life Publications
 #894-5401/02 or 894-5241.

Sa Diyos Lamang Nananalig

A ng pagsusugo sa Labindalawa ay napakahalaga sa buhay apostolado ni Hesus. Pagkatapos ng magdamag na pagdarasal, tinawag niya sila nang isa-isa (*sangguniin Lu 6:12...*) buhat sa iba't ibang pamumuhay, para maging mga katulong niya, ang “*panimulang pangkat*” ng kanyang mga disipulo.

Ang bilang na *labindalawa* ay hindi rin walang halagang detalye ni isang di sinasadyang pagkakatulad sa bilang ng mga lipi ng Israel. Bagkus, lahat ng ito'y bahagi ng isang plano – plano ni Kristong ang labindalawang ito ay siyang maging simula at sandigan ng bagong bayan ng Diyos, ang Simbahan. (*Sangguniin Pah 21:14.*)

At ang unang takdang gawain ay ang magtungo at gawin ang ginagawa ni Hesus sa kanyang buhay apostolado: *mangaral ng pagsisisi, magpaalis ng masasamang espiritu, at magpagaling sa mga maysakit.* (*Sangguniin Mc 6:12*) Nagkusa si Hesus na ibahagi sa kanila ang kanyang sariling misyon. Sa simula, ang kanilang pangangaral ay hanggang sa bayang Israel lamang muna, ngunit pagkatapos ng Pag-akyat, sila'y para na sa sanlibutan. (*Sangguniin Mc 16:15.*)

Ngunit saanman sila mapapunta para sa kanilang misyon, dalawang katangian ang magtatampok sa kanila: **karukhaan** at **pakikipaglayo.** (*Sangguniin Mc 6:8.*) Kung sa bagay, sila ang mga disipulo at sugo ng Panginoong walang ano mang batong pansapin sa kanyang ulo. Ang tanging dala nila ay ang “*Mensahe*” at ang kapangyarihang magpaalis ng masasamang espiritu at magpagaling sa mga maysakit.

Subalit sa kabila ng lahat nilang kapangyarihan, sila'y mananatiling mahina pa rin. Kasama nilang lagi ang karukhaan at ang pangnanib na sila'y tanggihan. Dito'y tulad sila ng matatandang propeta (*sangguniin ang Unang Pagbasa*) at ni Hesus mismo na itinakwil ng sarili niyang mga kababayan.

Gayunman, sa kabila ng kanilang pansariling kahinaan at ng mga pagtutol, magpapatuloy ang kanilang misyon hanggang sa wakas ng panahon. Mapaglalaban nila ang lahat ng sagabal, salamat sa patuloy na pamamalagi at tulong Niyang nagtagumpay na sa sanlibutan. (*Sangguniin Jn 16:33.*)



WORD & LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

E-mail: marketing@wordandlife.org, wordandlifepublications@gmail.com • FB: Word & Life Publications

Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio, V. David • Illustrations: A. Sarmiento, B. Cleofe • Circulation: F. Edjan